

Nefndasvið Alþingis
Efnahags- og viðskiptanefnd
Austurstræti 8-10
101 Reykjavík

Reykjavík, 17. febrúar 2022

Efni: Umsögn um frumvarp til laga um breytingu á lögum um viðspyrnustyrki, nr. 160/2020, 291. mál

Félag atvinnurekenda (FA) vísar til umsagnarbeiðni efnahags- og viðskiptanefndar dags. 8. febrúar sl. vegna ofangreinds máls á þingskjali 405.

Í frumvarpinu er lagt til að viðspyrnustyrkir vegna kórónuveirufaraldursins verði framlengdir, út marzmánuð. FA fagnar frumvarpinu eindregið. Félagið hefur allt frá því í október sl. lagt að stjórnvöldum að endurnýja eða framlengja ýmis þau stuðningsúrræði fyrir fyrirtæki, sem gripið var til á fyrri stigum faraldursins en féllu flest úr gildi um síðastliðin áramót. FA hvatti til þess að lagasetning yrði gerð þannig úr garði að hægt yrði að bregðast við áföllum fyrirtækja vegna faraldursins með sveigjanlegum hætti, í stað þess að löggjafinn væri ævinlega nokkrum skrefum á eftir.

Síðan hefur verið gripið til nokkurra úrræða sem mæta þessum tillögum og frumvörp þess efnis verið samþykkt á þingi; styrkir vegna launagreiðslna í sóttkví voru framlengdir út þetta ár, sérstakir viðspyrnustyrkir til fyrirtækja í veitingageiranum verða veittir út marz og verður hægt að sækja um lokunarstyrki út júní. Með þessu frumvarpi er jafnframt horft fram á við, þó að mati FA mætti gjarnan lengja gildistíma styrkjanna út apríl, þar sem enn sér ekki fyrir endann á vandræðum í rekstri fyrirtækja vegna faraldursins, til dæmis vegna þess að þau eigi torvelt með að halda úti hefðbundinni starfsemi vegna veikinda starfsfólks.

FA hafa borizt ábendingar frá félagsmönnum, sem vekja athygli á því að á viðmiðunartímabilinu sem tilgreint er í 1. tölul. 1. mgr. 4. gr. laga nr. 160/2020 hafi verðbólga verið umtalsverð og verði að taka tillit til þess í viðmiðum vegna tekjufalls. FA tekur undir að æskilegt væri að breyta viðmiðinu um tekjufall á milli viðmiðunarmánaða þannig að það taki mið af verðbólgu.

FA hvetur eindregið til þess að frumvarpið verði að lögum hið fyrsta, þannig að auðvelda megi fyrirtækjum sem orðið hafa fyrir áföllum vegna faraldursins að brúa bilið þar til áhrif faraldursins hafa fjarað út.

Félagið áskilur sér rétt til að koma á framfæri frekari athugasemdum á síðari stigum.

Virðingarfyllst,



Ólafur Stephensen
framkvæmdastjóri FA